

Sakspapir

Saksnr	Utvalg	Type	Dato
115/19	Formannskapet	PS	21.11.2019
086/19	Kommunestyret	PS	12.12.2019
004/19	Eldrerådet	PS	05.12.2019
013/19	Råd for menneske med nedsett funksjonsevne	PS	05.12.2019
019/19	Arbeidsmiljøutvalet	PS	09.12.2019

Saksbehandler	Arkiv	ArkivsakID
Olav Mongstad	FE-150	19/495

Budsjett 2020 og økonomiplan 2020-2023

Vedlegg

Budsjett 2020 og økonomiplan 2020-2023 (Feil på tabell)

Kutt i budsjett 2020 - uttale frå Fagforbundet v/HTV

Kutt i budsjett 2020 og nedbemanning i barnehagane i Austrheim Kommune

Innspel frå NSF ved Unn Iren Martinsen Tangedal

Frå Utdanningsforbundet - budsjettinnspel barnehage

Frå Utdanningsforbundet - budsjettinnspel skule

Konkrete framlegg til innsparingar/inntektsauke Austrheim sokn

Taloversyn - Budsjett 2019 - økonomiplan 2019-2023

Budsjett 2020 og økonomiplan 2020-2023 (PDF)

Innspel om Budsjettkutt - uttale frå FAU/SU Kaland barnehage

Innspel om flytting av 8. klasse ved Kaland ungdomsskule frå FAU Kaland

Rådmannen sitt budsjettsskriv 08.11.2019

Busstransport for dei som jobbar på Aufera - Budsjettsak

Epost_oversendelse_notat

Merknad1_RMNF_Sak_og_budsjettinnspel_busstransport_auferar_mnf

Sak_og_budsjettinnspel_busstransport_auferar_mnf

Vedlegg - Dokument-ID 196313 Budsjett 2020

Austrheim ungdomsråd - innspel til budsjettet for 2020

Budsjett 2020 - Appell frå barn og unges representant i Austrheim kommune

Styret og leiar for Austrheim ungdomsråd - innspel til Budsjett for 2020

Oppdatert taloversyn - Budsjett 2019 - økonomiplan 2019-2023

Framlegg til vedtak:

1. Budsjett 2020 – Økonomiplan 2020-2023, vert tilrådd slik det ligg føre i vedlagde tabelloppsett, med fylgjande endringar på driftsrammene for dei einskilde åra:

Rammeområde	2020	2021	2022	2023
Ansvar				

2. Total ramme for 2020 til fordeling drift vert kr. 200 307 000,- . Rådmannen har mynde til å tildele til dei ulike ansvarsområda innanfor denne ramma.

3. Den totale investeringsramma for år 2020 vert sett til 19 400 000 kr:

Føremål	Kostnad
Låneautomat bibliotek	100 000
Fagfornying skulane PC småskuletrinn	500 000
IKT skulane	150 000
IKT barnehagane	100 000
Kaland 1 skulekjøkken	100 000
Omsorgsteknologi	1 000 000
Steinalderbuplassen Fosnstraumen	200 000
Tiltak i landbruket	300 000
VA-investeringar	15 000 000
IKT kommunen	150 000
IKT felles i kommunen	400 000
Byggutbetring	500 000
Kyrkja – utbetring	700 000
Digitalisering/ombygging i Servicekontoret	200 000
	19 400 000

Den totale investeringsramma for 2020 vert finansiert slik:

Ordinært låneopptak 8, 4 mill

Overføre førre år 8,5 mill

Sal av eged. 2,5 mill

Prosjekt som vart vedteke for 2019 og ikkje er avslutta, vert vidareført innanfor vedteken ramme slik det vart finansiert i 2019.

Vekta avdragstid på låneopptak for 2020 vert fastsett til 30 år.

4. Måla for drifta vert vedteke slik dei går fram av kommuneplanen vedteke den 11.04.2019 i K-sak

017/19.

5. Rådmannen utarbeider detaljbudsjett og resterande lovfesta hovudoversikter, med bakgrunn i gjevne driftsrammer.

6. Kommunestyret skriv ut eigedomsskatt på næringseigedom, kraftverk, vindkraftverk, kraftnettet og anlegg omfatta av særskattereglane for petroleum jf. eigedomsskattelova (esktl.) § 3 første ledd bokstav d. Eigedomsskattesatsen vert vidareført med 7 promille. Utskrivingsalternativet omfattar også flytande oppdrettsanlegg i sjø, jf. Esktl. § 4 tredje ledd.

7. Takstvedtekter for eigedomsskatt i Austrheim kommune vedtatt i kommunestyret i K-sak 083/17 i møte 14.12.2017, skal gjelde for eigedomsskatteåret 2020, jf. esktl. § 10.

8. Kommunen vil i 2020 skrive ut eigedomsskatt på eigedommar som tidlegare var rekna som «verk og bruk» på eit «særskilt fastsett grunnlag» med heimel i overgangsregelen til eigedomsskattelova §§ 3 og 4 første ledd. Det særskilde grunnlaget skal i 2020 være lik 5/7 av differansen mellom eigedomsskattegrunnlaget i 2018 og 2019 som er forårsaka av at produksjonsutstyr- og installasjonar ikkje skal reknast med i grunnlaget.

9. Kommunen vil i 2020 skrive ut eigedomsskatt på bygningar og grunnareal så langt desse var omfatta av eigedomsskattegrunnlaget for verk og bruk i 2018, jf. overgangsregelen til eigedomsskattelova §§ 3 og 4 andre ledd.

10. Eigedomsskatten vert skriven ut i 2 terminar jf. esktl. § 25 første ledd. Siste alminnelege taksering i kommunen vart gjennomført i 2018 og 2019.

11. Marginavsetnad vert fastsett til 10% for 2020.

12. Kommunestyret ber om at rådmannen gjer følgjande utgreiingar i 2020:

Kostnadar og faglege effektar av å samla ungdomstrinnet på ein av skulane i kommunen. Her må både investeringskostnadar og driftskostnadar gjerast greie for og det må leggjast fram ein realistisk framdriftsplan.

Kostnadar og faglege effektar av å samla mellomtrinnet på ein av skulane i kommunen. Her må både investeringskostnadar og driftskostnadar gjerast greie for og det må leggjast fram ein realistisk framdriftsplan.

Kommunestyret ber om klare råd om korleis skulestrukturen i kommunen skal vera i framtida. Målet må vera at ein kan få på plass ein ny skulestruktur frå skuleåret 2021/2022.

Kommunestyret ber også rådmannen om å starta drøftingar med Alver kommune om godtgjersle for elevar frå Åsheim-krinsen som går på Kaland barne- og ungdomsskule.

Punkt 12 her erstattar punkt 12 frå formannskapet:

12. Kommunestyret ber om at rådmannen gjer følgjande utgreiingar i 2020:

Kostnadar, pedagogiske og sosiale effektar av å samla ungdomstrinnet på ein av skulane i kommunen. Her må både investeringskostnadar og driftskostnadar gjerast greie for og det må leggjast fram ein realistisk framdriftsplan.

Kostnadar, pedagogiske og sosiale effektar av å samla mellomtrinnet på ein av skulane i kommunen.

Her må både investeringskostnader og driftskostnader gjerast greie for og det må leggjast fram ein realistisk framdriftsplan.

Kommunestyret ber om klare råd om korleis skulestrukturen i kommunen skal vera i framtida. Målet må vera at ein kan få på plass ein felles ungdomsskule frå skuleåret 2021/2022.

Kommunestyret ber også rådmannen om å starta drøftingar med Alver kommune om godtgjersle for elevar frå Åsheim-krinsen som går på Kaland barne- og ungdomsskule.

13. Skule og 8. klasse ved Kaland barne- og ungdomsskule i 2020/2021. Kommunestyret viser til det første punktet i dette budsjettnotatet, og understrekar at debatten om lokalisering av ein felles ungdomsskule i kommunen ikkje vil bli påverka av om elevane på 8. klassetrinn vert samla på Årås skule komande skuleår.

14. Austrheim kommunestyre utsett den delen av saka som omhandlar flytting av 8. klasse, og ber om at rådmannen tar kontakt med dei berørte parter og komma tilbake med ei sak til neste kommunestyremøte, som vurderer fordelar og ulemper ved denne saka.

15. Pleie og omsorg. Rådmannen må i første kvartal 2020 setja i gang arbeidet med å oppdatere «Eldremeldinga». Ei oppdatert eldremelding skal danne grunnlaget for utviklinga av pleie- og omsorgsavdelinga både når det gjeld bemannings- og investeringsplanar. Investeringsplanane må innehalda tiltak retta mot sjukeheims plassar, omsorgsbustadar og omsorgsteknologi.

Kommunestyret ber om at den nye «Eldremeldinga» vert lagt fram til politisk behandling innan sommaren 2020.

«Eldremeldinga» må ta utgangspunkt i målet om å etablera ein heiltidskultur i kommunen.

Kommunestyret ber om at rådmannen lagar ein plan for å etablera ein slik heiltidskultur i samarbeid med tillitsvalte og verneombod.

16. Vatn og avlaup. Dei største investeringane dei komande åra vil vera knytt til vatn og avlaup.

Kommunestyret ber om at ein oppdatert investerings- og framdriftsplan for dette fagfeltet vert lagt fram for kommunestyret 13. februar 2020.

17. Klima og miljøplan. Kommunestyret ber rådmannen laga ein ny klima og miljøplan. Målet må vera at Austrheim kommune berre skal nytta fornybar energi til oppvarming av bygg innan utgangen av 2025. Alle personbilar og små varebilar som kommunen kjøper i perioden etter 2021, skal vera nullutsleppskøyretøy. Nye ladepunkt må etablerast. Klima og miljøplanen skal også innehalda tiltak som sikrar at alle avdelingar i kommunen skal vera sertifiserte «Miljøfyrtårn» innan 2023.

18. Trafikksikring. Austrheim kommune har dei siste åra fått fleire tilskot frå fylkeskommunen til trafikksikringstiltak. Årsaka til dette er at kommunen har hatt ein relativt oppdatert og realistisk trafikksikringsplan. Det har også vore god samanheng mellom trafikksikringsplanen og vedtekne regulerings- og områdeplanar. No må trafikksikringsplanen oppdaterast slik at den også i framtida kan danne grunnlag for nye tilskot til trafikksikringsarbeidet i kommunen.

19. Bruk av lokalt næringsliv. Fleire av våre lokale butikkar er med i Merkur-programmet. Det er eit mål for statlege myndigheiter å sikra eit desentralisert tenestetilbod til innbyggjarane og gjennom Merkur-programmet ønskjer dei å styrka dei små distriktsbutikkane. Kommunestyret ber rådmannen greia ut om det er mogeleg for kommunen å handla meir lokalt både når det gjeld varer og tenester slik at kommunen kan bidra til å sikra eit lokalt mangfald av bedrifter.

20. Skyss Aufera. Rådmannen får i oppdrag, i samarbeid med brukarane og Aufera, å organisere eit tilfredsstillande skyssstilbod til våre arbeidstakarar på Aufera. I tillegg ber ein om ei vurdering av det generelle transportbehovet i kommunen.

21. Barnehagane. Styrar i barnehagane må få handlingsrom og ekstra midlar for å kunna tilkalla assistent dersom dette er naudsynt for å sikra forsvarleg drift. Dette gjeld dei timane pedagogane ved barnehagane skal avvikla plantida si.

Barnehagane får behalda assistentar som tilsvarer 1,2 årsverk i Austrheim Kystbarnehage og 0,6 årsverk i Kaland barnehage.

22. Ungdomsrådet. Ungdomsrådet i Austrheim er ein viktig ressurs i arbeidet med å skapa ein kommune med gode oppvekstvilkår. Kommunestyret beklagar at Ungdomsrådet mista heile den økonomiske støtta frå kommunen i 2019. Kommunestyret løyver med dette kr 30.000,- i støtte til Ungdomsrådet sitt arbeid i 2020.

23. Auke budsjettet for kulturmidlar/anna kultur med kr. 100.000,-.

24. Nedtrekket til Austrheim Sokn vert redusert frå 500.000 kr til 300.000 kr.

25. Austrheim kommune innfører eigedomsskatt på hus og hytter frå og med år 2020 til og med 2023.

Det vert sett ned eit utval som vurderer konsekvens av slik eigedomsskatt:

- for alle innbyggjarar
- at det er mogeleg å ta den bort
- vurdering skal leggjast fram for kommunestyret våren 2020.
- evt. eigedomsskatt vert innført hausten 2020

26. Om nye verbalpunkt: Med dette notatet vil kommunestyret gje rådmannen nokre prioriterte oppgåver. Nokre av framlegga vil ha økonomiske konsekvensar som vil endra budsjettbalansen. Me ber om at rådmannen gjer justeringar i budsjettet for å dekkja inn dei ekstra kostnadane.

Administrasjonen får mynde til å justera nummereringa av verbalpunkta etter kva som vert endeleg vedteke.

Formannskapet - 115/19 - 21.11.2019

FS - behandling:

Ordførar Per Lerøy (Ap) sa om budsjettering for havbruksfondet at det er likt andre kommunar å budsjettera på denne måten, det er lagt inn 5 millionar anna kvart år og 440.000 det andre året.

Lerøy etterlyste midlar i post 18007 - skjønsmidlar frå Fylkesmannen. Økonomisjef Olav B. Andersen og rådmann Liv Løvvik svara at det er sagt frå Fylkesmannen at det ikkje er sikkert at det kjem midlar her, og rådmannen ønskjer ikkje å budsjettera med midlar som ein ikkje er sikker på.

Lerøy la til at dette var eit skjøn som kommunen fekk på grunn av at småkommunetilskotet vart halvert, og der fekk ein to millionar kroner ekstra for å kompensera litt av dette.

Ordførar Lerøy viste til at utbyttet frå BKK nok vil enda rundt 2 millionar kroner.

Ordførar Lerøy etterlyste at heile inntektsveksten frå VA er teke med i budsjettet, og meiner at kommunen sine egne utgifter til renter og avdrag ikkje skal auka i samband med dette. Må ta kostnadene ved VA-investeringar over på brukarane av desse tenestene, så snart arbeidet er gjort.

Økonomisjef Andersen lova å sjekka dette med VA-utgifter innan kommunestyret 12/12.

Økonomisjef Andersen sa at kommunen har fastrente, med renter på under 2 prosent. Om ein no skal binda igjen er det på høgare renter. Austrheim har treft godt med rentebinding tidlegare, på 1,7 og 1,9 prosent. Ein halv prosent auke i rente gjev ein million kroner i årlege renteutgifter.

Rådmann Løvvik sa at ein må vurdere dette med fastrente nøye, det er ulike prognoser for kva som er lurt å gjera.

Økonomisjef Andersen viste til at for økonomiplanperioden så skal ein ned sytten millionar dei kommande fire åra, og det er sett opp ein del kutt dei tre siste åra i perioden. Rådmannen har lagt opp til 4,9 millionar i årleg overskot for å nå minstekravet på 1,75 prosent i resultat.

Løvvik viste til at dette er minstekravet for overskot, og særleg viktig for Austrheim som ikkje har særlege fondsmidlar å tæra på.

Ordførar Lerøy støtta rådmannen i at det er viktig for kommunen å ha fond i bakhand, når ein til dømes frå Havbruksfondet har inntekter annakvart år. Lerøy la til at det kan verta endringar på statlege rammer, for det er så mange fylke og kommunar som slit.

Varaordførar Inger Lise Brekke sa at ho ikkje trur det vert romslegare for kommunane framover, når ein ser situasjonen heile landet under eitt. Må avgrensa kva kommunen skal beskjeftiga seg med, og planlegga med at det vert stramt. Uansett kva regjering det er som styrer, så er det for store utgifter på statleg nivå, anten det er utføre eller sjukepengar. Dagens nivå er ikkje berekraftig.

Løvvik sa om lærlingar at kostnaden varierer, etter kvart som læringane er komne lengre løpet så kostar meir. Om barnevernet sa Løvvik at ein ønskjer å redusera kostnadene vert å få til betre tiltak. Må klara å unngå eineplasseringar, som er veldig kostbare og heller ikkje heldig for barnet som har dette tilbodet. Barnevernet skal i samarbeid med Alver, men viktig at eit samarbeid som dette er sjølvfinansierande og ikkje bidreg til å finansiera tenesta hjå vertskommunen.

Ordførar Lerøy etterlyste ei grundig orientering om kva som har skjedd i barnevernet i Austrheim, kva har skjedd dei siste åra, og kva ser ein for seg vidare. Lerøy viste til at han hadde snakka med ordførarane i Masfjorden og Gulen, som har fått gode tilbagemeldingar på tenestene i eit tilsyn frå Fylkesmannen, men kritikk for at politikarane ikkje visste nok om korleis tenestene fungerer.

Assisterande rådmann Olav Mongstad sa at dersom ein kjem i posisjon til å starta samarbeid med Alver så må det opp som sak i kommunestyret i desember, og då kan det vera naturleg å ta ei orientering om arbeidet i barnevernet.

Rådmann Løvvik sa at Austrheim ønskjer å reforhandla gjesteelev-avtalen med Lindås kommune. Denne er frå 90-talet, og gjev 25.000 kroner til Austrheim per elev, medan sum etter ein ordinær avtale er 100.000 kroner. Dersom ein kjem opp i sjølvfinansiering er det oppunder 1 million i ekstra inntekt berre frå andre halvår 2020.

Om klasseflytting sa ordførar Lerøy at det å flytta åttande trinn frå Kaland til Årås verkar som ein start på flytting av ungdomstrinnet til Årås, utan at det er gjort vedtak om dette. Ei slik flytting kan få mykje motstand.

Assisterande rådmann Olav Mongstad sa at han ser at det kan bli problematisk. Administrasjonen legg dette fram, men så kan politikarane kan be om at dette vert utgreidd nærare.

Helge Dyrkolbotn (KrF) sa at han nok ville gå for rådmannens framlegg, men er samstundes samd med ordførar Lerøy i at det må startast eit større arbeid, og der bør ein seia at hausten 2021 skal ein ha ein felles ungdomsskule i Austrheim.

Morten Sognnes (H) sa at han ser at utdanningsforbundet vil ha fådelt skule for desse, på Kaland. Sognnes sa at med ein ny avtale med Alver kan ein få auka inntekter for desse gjeste-elevane på Kaland, det får ein ikkje ved ei flytting til Årås, for då vert ikkje desse elevane med. Sognnes sa vidare at med ei flytting til Årås så kan ein risikera at også Kaland-elevar vil søka seg til Lindås ungdomsskule.

Olav Mongstad sa at dersom ein ikkje flyttar elevane i 8. klasse frå Kaland til Årås, og slår saman 8. og 9. på Kaland til fådelt klasse, så vil det bety at ein brukar 40 prosent meir lærarressurs enn om ein flyttar desse elevane til Årås. Mongstad viste tal for elevutviklinga framover (ligg ved).

Inger Lise Brekke (H) sa at ho var skeptisk til fådelt skule, når undervisninga skal vera individuelt tilrettelagt for den enkelte eleven. Dette er veldig krevjande å få til.

Olav Mongstad sa at det er utvikla ein eigen pedagogikk får fådelt skule der ein vekslar mellom årsplanane på kvar ein hentar stoffet sitt. Det er problematisk i matematikk, der det er strengare krav til progresjon, men greitt i fag som norsk og samfunnsfag.

Inger Lise Brekke (H) sa at det er ein ting er å gjera noko akutt no, men det kan ikkje legga føringar på korleis ein kan løysa dette vidare.

Rådmann Løvvik viste til at det pågår ein prosess med å tilsetja ny leiar for oppvekst og kultur, og dette med å samla ungdomsskulane er det første som denne må ta fatt i. Men det å samla klassane på alle ungdomsskuletrinn til ein klasse er det ikkje mogleg å gjera, sidan det er for mange elevar til å ha ein klasse.

Ordførar Per Lerøy sa at det ikkje er tilstrekkeleg at det vert sagt i møtet at dette ikkje er første del av ei flytting til Årås. Rådmannen eller kanskje heile formannskapet må møte foreldre i Kaland-krinsen om dette, og få ut informasjonen.

Ønsket frå Ap/H er å samla ungdomsskulen på ein skule, men også samla mellomtrinnet. Ein vil starta arbeidet med å visa korleis dette kan gjerast, sjå på kostnader til investeringar med meir, og ha det klart slik at det kan settast i verk frå skuleåret 2020/2021.

Helge Dyrkolbotn (KrF) sa seg samd i at det må skje noko. Ikkje fleire nemnde, rådmannsgruppa må berre setta i gang!

Lerøy presiserte at dette måtte vera ei rein administrativ gruppe, utan politiske medlemmer.

Olav Mongstad sa at gjesteelev-avtalen med Lindås har seks månaders oppseiing, og skal ein seia den opp så må det skje etter politisk vedtak.

Helge Dyrkolbotn (KrF) sa at ein må ta med i budsjettvedtaket at ein skal seia opp avtalen for reforhandling.

Per Lerøy (Ap) sa at målet må vera at ein skal komma i mål med denne avtalen, det er viktig for miljøet på Kaland at elevane frå Åsheim-krinsen går der.

Rådmann Løvvik sa at Austrheim vil tapa 25.000 kroner x 31 elevar = 775.000 kroner om ein misser alle desse Kaland-elevane til Lindås (elevane frå Åsheim-krinsen).

Inger Lise Brekke (H) sa om skule at ein ser frå andre kommunar at det er god effekt med å tilsetta ein miljøarbeidar, som jobbar med andre ting enn det faglege, som skulemiljøet med meir. Det er ikkje lovpålagt, men likevel ei styrking av det arbeidet som skulen gjer.

Rådmann Løvvik svara at det kan ein gjera, men det kan ikkje erstatta det faglege.

Ordførar Lerøy etterlyste informasjon ut om at Anita Soltveit er folkehelsekoordinator i Austrheim kommune. Møtesekretæren tok på seg å informera.

Kommunalsjef helse og omsorg Monika Kvamme sa om kutt i arbeids- og opplæringscenteret, at her er det eigentleg ikkje kutta men det er lønna som er flytta over til Vestlia. Tilsette i Vestlia følgjer med opp på arbeidssenteret.

Ordførar Lerøy sa om startlånordninga at kommunen må nytta dei ordningane som Husbanken, har

til å hjelpe familiar til å kjøpe eigen heim. Til dømes ved å bruka 50 års nedbetalingstid og liknande.

Om Nordliheimen sa økonomisjef Olav B. Andersen at det er ein større auke i budsjettet, men det var budsjettett feil i 2019 og dette er ei korrigerings av dette. Dette er ei justering opp til det ein reelt sett brukar.

Om interkommunalt landbrukskontor sa Olav Mongstad at ein tek sikte på å gå inn i Alver, med ei bemanning tilsvarande i dag.

Om vatn, avløp og renovasjon sa økonomisjef Olav B. Andersen at ein skal sjå nærare på dette med at inntektene skal dekke auka utgifter til investeringar.

Om befolkningsvekst sa økonomisjef Olav B. Andersen at ein reknar 35.000 per person i inntektsvekst per nye innbyggjar.

Økonomisjef Olav B. Andersen sa om økonomiplanen at det ligg uspesifiserte nedtrekk for åra vidare, i 2021, 2022 og 2023.

Helge Dyrkolbotn (KrF) la fram eit framlegg med innføring av eigedomsskatt (Vedlegget ligg ved) For 2020 er det sett opp korleis dei ekstra midlane skal fordelast. Dyrkolbotn sa at det er drastisk å kutta så mykje i ungdomstilbodet. Dette tilbodet er med på å gjera det attraktivt å flytta til Austrheim. Ein har bygd opp eit ungdomsklubbtildod, og har lag og organisasjonar som driv godt. For KrF er det viktig å gje ein grunn til å bu her, det må vera attraktivt. I KrF sitt framlegg er eigedomsskatten lagt inn med auke ein promille årleg opp til høgaste promille. Dyrkolbotn sa vidare at dersom ein spør folk i Austrheim om dei vil vera med på spleiselag for dette, så seier dei ja. Andre kommunar har brukt eigedomsskatten til å komma seg ut av Robek, og klart å fjerna den etterpå. Det er upopulært, men KrF skal klara å stå i dette.

Økonomisjef Olav B. Andersen gjekk gjennom investeringsbudsjettet.

Morten Sognnes (H) etterlyste om det er noko innsparing frå investeringane, til dømes innan omsorgsteknologi.

Kommunalsjef helse og omsorg Monika Kvamme svara at det vil gå mange år før ein ser noko effekt av dette på stillingar. Noko av investeringane er frå fornying av ringeanlegget på Nordliheimen, det må ordnast uansett.

Inger Lise Brekke (H) spurte om investering til steinalderbuplass, kan ein skyva vidare på dette? Dette er spørsmål om prioritering, er skeptisk til at ein får effekt av dette på besøkstal med meir.

Assisterande rådmann Olav Mongstad svara at fylket har gitt 400.000 kroner og riksantikvaren 270.000 kroner, som ein har fått utsett bruken av til 2020. Det er sagt at dette skal vera eit fyrtårnprosjekt, og ein vil knyta det opp i biosfæreprosjektet i Nordhordland. Korleis kan ein gjera ting i Fosnstraumen for å tilretteleggja, for fridykking, fiske, kanskje med å laga ei gangbru og amfi? Om me ikkje startar arbeidet i 2020 så har me ikkje midlar til dette. Mongstad sa vidare at Austrheim skal i møte med fylket og andre i prosjektet i desember.

Ordførar Lerøy viste at det står nesten 700.000 kroner som ein ikkje får om det ikkje skjer noko med prosjektet. Kanskje kan ein få biosfæreprosjektet til å ta noko av denne kostnaden, for å bruka prosjektet til å fortelja historia om regionen frå steinalder til oljealder? Lerøy vil la denne posten stå inntil vidare.

Helge Dyrkolbotn sa at det er fornuftig å halda på dette vidare, for å sjå om regionen/biosfæreprosjektet kan ta noko av kostnaden, og prøva å få midlar ekstern i Europa.

Olav Mongstad sa at dette er ein kommunal eigendel, og så kan ein søka om ulike midlar i tilskot for å realisera dette.

Rådmann Løvvik sa at ein kan bruka prosjektet til å skapa ein reiselivsdestinasjon, med ei historie som er litt annleis. Biosfære handlar om berekraft, det er mange opptekne av i dag. Trur at biosfære kan vera ein sjanse til å fortelja ei anna historie enn det alle andre kan fortelja. Oppfordrar til å leita opp Aftenposten Innsikt sin omtale av dette.

Ordførar Lerøy sa at ein kan gje prosjektet tid fram til kommunestyret 12. desember.

Avrøysting:

To røyster for KrF sitt framlegg om eigedomsskatt (Helge Dyrkolbotn, KrF, og Bjørn Inge Håland Dyrkolbotn, Sp). Framlegget fall. Teksten var slik:

Framlegg frå Austrheim KrF Sak 115/19 Budsjett 2020 og økonomiplan 2020-2023

Austrheim kommune innfører eigedomsskatt frå og med år 2020 til og med 2023

*Dette vil gje fylgande auke i **frie disponible inntekter (ca tal)**:*

2020	2021	2022	2023	totalt
2 mill	4 mill	6 mill	8 mill	20 mill

Dei ekstra inntektene vert fordelt slik for 2020:

	2020
Kulturmidlar/anna kultur	200.000
Skyss til Aufera	400.000
Kulturskulen	250.000
Austrheim sokn	300.000
Auka ressurser oppvekstsektoren	500.000
Ungdomsrådet	50.000
Disp.fond	350.000

Samrøystes for Ap/Høgre sitt framlegg om skulen, som går inn som verbalpunkt nummer 12 i budsjettvedtaket som er sendt vidare til kommunestyret. Teksten er slik:

Kommunestyret ber om at rådmannen gjer følgjande utgreiningar i 2020:

Kostnadar og faglege effektar av å samla ungdomstrinnet på ein av skulane i kommunen. Her må både investeringskostnadar og driftskostnadar gjerast greie for og det må leggjast fram ein realistisk framdriftsplan.

Kostnadar og faglege effektar av å samla mellomtrinnet på ein av skulane i kommunen. Her må både investeringskostnadar og driftskostnadar gjerast greie for og det må leggjast fram ein realistisk framdriftsplan.

Kommunestyret ber om klare råd om korleis skulestrukturen i kommunen skal vera i framtida. Målet må vera at ein kan få på plass ein ny skulestruktur frå skuleåret 2021/2022.

Kommunestyret ber også rådmannen om å starta drøftingar med Alver kommune om godtgjersle for elevar frå Åsheim-krinsen som går på Kaland barne- og ungdomsskule.

Samrøystes for rådmannen sitt framlegg (men ordførar Per Lerøy presiserte at ein kan komma tilbake til summar og verbalpunkt når budsjettsaka skal opp i kommunestyret).

Handsaming i formannskapet:

To av tre for KrF sitt framlegg om eigedomsskatt (støtte frå Helge Dyrkolbotn, KrF, og Bjørn Inge Håland Dyrkolbotn, Sp)

Samrøystes for Ap/Høgre sitt tilleggsframlegg om skule.

Samrøystes for rådmannens framlegg.

FS - vedtak:

1. Budsjett 2020 – Økonomiplan 2020-2023, vert tilrådd slik det ligg føre i vedlagde tabelloppsett, med fylgjande endringar på driftsrammene for dei einskilde åra:

Rammeområde	2020	2021	2022	2023
Ansvar				

2. Total ramme for 2020 til fordeling drift vert kr. 200 307 000,- . Rådmannen har mynde til å tildele til dei ulike ansvarsområda innanfor denne ramma.

3. Den totale investeringsramma for år 2020 vert sett til 19 400 000 kr:

Føremål	Kostnad
Låneautomat bibliotek	100 000
Fagfornying skulane PC småskuletrinn	500 000
IKT skulane	150 000
IKT barnehagane	100 000
Kaland 1 skulekjøkken	100 000
Omsorgsteknologi	1 000 000
Steinalderbuplassen Fosnstraumen	200 000
Tiltak i landbruket	300 000
VA-investeringar	15 000 000
IKT kommunen	150 000
IKT felles i kommunen	400 000
Byggutbetring	500 000
Kyrkja – utbetring	700 000
Digitalisering/ombygging i Servicekontoret	200 000
	19 400 000

Den totale investeringsramma for 2020 vert finansiert slik:

Ordinært låneopptak 8,4 mill

Overføre førre år 8,5 mill

Sal av eigd. 2,5 mill

Prosjekt som vart vedteke for 2019 og ikkje er avslutta, vert vidareført innanfor vedteken ramme slik det vart finansiert i 2019.

Vekta avdragstid på låneopptak for 2020 vert fastsett til 30 år.

4. Måla for drifta vert vedteke slik dei går fram av kommuneplanen vedteke den 11.04.2019 i K-sak 017/19.

5. Rådmannen utarbeider detaljbudsjett og resterande lovfesta hovudoversikter, med bakgrunn i gjevne driftsrammer.

6. Kommunestyret skriv ut eigedomsskatt på næringseigedom, kraftverk, vindkraftverk, kraftnett og anlegg omfatta av særskattereglane for petroleum jf. eigedomsskattelova (esktl.) § 3 første ledd bokstav d. Eigedomsskattesatsen vert vidareført med 7 promille. Utskrivingsalternativet omfattar også flytande oppdrettsanlegg i sjø, jf. Esktl. § 4 tredje ledd.

7. Takstvedtekter for eigedomsskatt i Austrheim kommune vedtatt i kommunestyret i K-sak 083/17 i møte 14.12.2017, skal gjelde for eigedomsskatteåret 2020, jf. esktl. § 10.

8. Kommunen vil i 2020 skrive ut eigedomsskatt på eigedommar som tidlegare var rekna som «verk og bruk» på eit «særskilt fastsett grunnlag» med heimel i overgangsregelen til eigedomsskattelova §§ 3 og 4 første ledd. Det særskilde grunnlaget skal i 2020 være lik 5/7 av differansen mellom eigedomsskattegrunnlaget i 2018 og 2019 som er forårsaka av at produksjonsutstyr- og installasjonar ikkje skal reknast med i grunnlaget.

9. Kommunen vil i 2020 skrive ut eigedomsskatt på bygningar og grunnareal så langt desse var omfatta av eigedomsskattegrunnlaget for verk og bruk i 2018, jf. overgangsregelen til eigedomsskattelova §§ 3 og 4 andre ledd.

10. Eigedomsskatten vert skriven ut i 2 terminar jf. esktl. § 25 første ledd. Siste alminnelege taksering i kommunen vart gjennomført i 2018 og 2019.

11. Marginavsetnad vert fastsett til 10% for 2020. Kommunestyret ber om at rådmannen gjer følgjande utgreiingar i 2020:

Kostnadar og faglege effektar av å samla ungdomstrinnet på ein av skulane i kommunen. Her må både investeringskostnadar og driftskostnadar gjerast greie for og det må leggjast fram ein realistisk framdriftsplan.

Kostnadar og faglege effektar av å samla mellomtrinnet på ein av skulane i kommunen. Her må både investeringskostnadar og driftskostnadar gjerast greie for og det må leggjast fram ein realistisk framdriftsplan.

Kommunestyret ber om klare råd om korleis skulestrukturen i kommunen skal vera i framtida. Målet må vera at ein kan få på plass ein ny skulestruktur frå skuleåret 2021/2022.

Kommunestyret ber også rådmannen om å starta drøftingar med Alver kommune om godtgjersle for elevar frå Åsheim-krinsen som går på Kaland barne- og ungdomsskule.

Eldrerådet - 004/19 - 05.12.2019

ER - behandling:

Økonomisjef Olav B. Andersen orienterte om budsjettet for 2020 (lysark ligg ved).

Rammetilskotet har gått ned, mellom anna i samband med at tidlegare øymerka tilskot går inn i ramma utan at ramma vert fullt ut auka tilsvarande, og ved at småkommunetilskotet er kutta utan kompensasjon.

Skatteinngangen er god, mellom anna etter stor aktivitet hjå Equinor Mongstad i haust, men noko av dette kan gå til andre kommunar som følgje av at ein kjem over grensa for inntektsutjamning.

Kommunen har fastrente på ein del av gjelda no, og ventar med å binda meir. Skulle renta gå opp vil kommunen få ein million ekstra i utgifter per halve prosent som renta stig. Samstundes som høgare rente gjev auka utgifter på lån, gjev det også lågare pensjonsutgifter sidan KLP får betre avkastning av midlane sine.

Liv Løvvik sa at kommunen vil venta no med å binda meir av renta, sidan det er stor usikkerheit om korleis renta vil bevega seg dei næraste åra.

Olav B. Andersen tok ein gjennomgang av dei ulike postane i 2020-budsjettet.

Solbjørg Sætre spurte kva som gjekk på posten for vaksenopplæring, om dette var noko som gjekk på eldre.

Monika Kvamme svara at midlar under denne posten gjekk til ulike opplæringsføremål, men ikkje mot eldre. Posten omfattar mellom anna også tilrettelagt undervisning for yngre.

Om investeringar sa Olav B. Andersen at dei største postane var til investeringar i vatn og avlaup, der dette vert dekkja inn gjennom auke i til dei tilhøyrande gebyra.

Monika Kvamme sa at det skal investerast ein million i 2020 til nytt alarmanlegg på Nordliheimen, dagens anlegg er så gammalt at ein ikkje får delar til det lengre.

Olav B. Andersen sa at talbudsjettet er sendt også til Fylkesmannen, som vil ta ein gjennomgang før budsjettmøtet i kommunestyret 12. desember.

Solbjørg Sætre spurte kva kommunen ønskjer å selja. Liv Løvvik svara at det ikkje er avgjort kva areal som vert selt i 2020, men ein jobbar med fleire aktuelle objekt.

Rådmann Liv Løvvik viste ei orientering om den økonomiske utviklinga for kommunen framover (lysarka ligg ved).

Den store investeringa i 2020 er VA. Kommunen har høg gjeld, og ligg over både kommunegruppe 2 (som det er mest naturleg å samanlikna seg), og snitt i landet for gjeld per innbyggjar.

Utviklinga vidare er at Austrheim taper på kutt i det kommunale skatteøret, taper på høg lønsvekst sidan lønsandelen av utgiftene er høgare enn snittet, og taper på at rammeoverføringa ikkje vert auka tilsvarande prisveksten. Ser også at i dei interkommunale samarbeida så er det ofte ein høgare vekst enn i eigne tenester. Må jobba med å bygga disposisjonsfond, skulle hatt eit fond på 30 millionar. Framover er det utfordrande med at det er færre born enn tidlegare.

Monika Kvamme sa om den demografiske utviklinga at det vert fleire rullatorar enn barnevogner.

Fleire må bu heime lengre, og sjukeheimen vert berre for demente og dei som er alvorleg sjuke. Det inneber at fleire må sjå på sin eigen bustad og leggja til rette for at dei kan bu heime lengre.

Kommunen må setja seg ned med organisasjonane for dei eldre og sjå på kva som er utfordringane og moglegheitene i Austrheim. Må også sjå på kvar det er folk ønskjer å busetja seg, då ein ser at mange ønskjer å bu nærare ulike servicetilbod.

Liv Ulvøy sa at dette er noko kommunen må ut og informera meir om, tidlegare har kommunen hatt vaktmester som har vore ute og hjulpet til med å fjerna dørstokkar, men dette er det ikkje midlar til i

dag.

Liv Løvvik avslutta med å visa til at det er strammare utsikter framover, der 2020 er det beste året i økonomiplanperioden, med mest pengar til å bruka i drift av dei fire neste åra i perioden. Har samstundes tru på at kommunen skal komma seg ut av Robek-lista.

Arbeidet vidare vert å jobba med omsorgstrappa, og sjå korleis ein kan få på plass gode bustader til eldre som ikkje kan bu heime, men heller ikkje skal på institusjon.

Løvvik viste til den konkrete lista for kutt/inntektsauke for 2020 (Excel, ligg ved).

Skal forhandla med Lindås om ei oppdatering av avtalen og gjesteelevar ved Kaland skule, der Austrheim i dag før 25.000 kroner medan statleg start er 100.000 kroner.

Merethe Rikstad Tresvik sa om gjesteavtalen med Lindås/Alver at ein må unngå at elevane ikkje lenger får gå på Kaland skule.

Løvvik svara at Lindås/Alver må følgja nærskuleprinsippet, og dersom elevane frå Åsheim-krinsen ikkje skal få gå ved den næraste skulen. Austrheim og Lindås/Alver har saman eit ansvar for å halda oppe dette miljøet på Kaland, men Austrheim kan ikkje finansiera dette.

Monika Kvamme sa at ein i 2020 skal i gang med ein god del arbeid der eldrerådet skal involverast, som å skriva ny utgåve av eldremeldinga, ein habiliterings/og rehabiliteringsplan, plan for brukarmedverknad, og opplegg/brosjyre for førebyggjande heimebesøk.

ER - vedtak:

Eldrerådet kom ikkje med nokon uttale til budsjettet.

Råd for menneske med nedsett funksjonsevne - 013/19 - 05.12.2019

RMNF - behandling:

Atle Utkilen viste til dei spørsmåla han har stilt i forkant av møtet. Kommunalsjef helse og omsorg, Monika Kvamme, svara på vegner av administrasjonen.

Spørsmål: - Kven eig bussen, kva skjer med den.

Svar: - Det er ein 16-setar som kommunen eig.

Spørsmål: - Har kommunen støtte frå Fedje?

Svar: - Brukaren frå Fedje betalar 20 kroner per reise.

Spørsmål: - Er det støtte frå Nav til dette busstilbodet.

Svar: - Kommunen har fått støtte til kjøringa, men dette vil gå ut i samband med at sjåføren per i dag går av med pensjon.

Spørsmål: - Kva er rekneskapet for drifta av bussen?

Svar: - Drift av bussen vidare ville ha kosta 7-800.000 kroner årleg, med løn, andre kostnader og buss/vedlikehald. Brukarbetaling er så langt i 2019 på 47.000 kroner.

Spørsmål: - Kva anna bruk er det av bussen?

Svar: - Anna bruk er skulane i samband med svømming, Landbruksdagen, Boccia-laget med meir. Det er mindre utleige no enn det har vore tidlegare.

Monika Kvamme sa vidare at Nav viser vidare til fylket for denne transporten, men fylkeskommunen har på si side i 2020-budsjettet lagt opp til å leggja ned ordninga med skyss i samband med VTA-plassar.

Randi Keilegavlen Dyrøy sa at dette kuttet er det ein del av innsparinga kommunen er inne i.

Rådmann Liv Løvvik sa at det er ikkje lett å gjera dette kuttet, men ein må sjå det opp mot andre kutt som er gjort.

Elsa Skare sa at det er dei best fungerande som kan ta denne ti på sju-bussen (rutebuss), der dei også må venta utandørs på Radøy for skifte av buss. Trur det vil føra til fråvær, som igjen vil gje problem for Aufera. Det vert feil å kutta i dette tilbodet for dei svakaste, som kan gje enkelte brukarar høge drosjeutgifter. Brukarane har ikkje valt at dette tilbodet skal vera på Manger, det var på Austrheim tidlegare, men vart så flytta til Manger på Radøy.

Monika Kvamme sa om prisen på bussen at Skyss tek 19 kroner billetten, kommunen tek 20 kroner. Vidare sa Kvamme svara at Aufera også må tilpassa seg med arbeidstida for brukarane, og leggja det opp slik at ein kan ta bussar som går heilt fram. Dette fungerer i dag for ein del brukarar to av dagane i veka, sidan det kommunale busstilbodet berre er i drift måndag/onsdag/fredag.

Solbjørg Sætre sa at det her vert kutta i tilbodet til dei aller svakaste.

Økonomisjef Olav B. Andersen viste til at det er kutta 16 årsverk i kommunen i 2019, og at det skal kuttast vidare i 2020. Dette nedtrekket er konsekvensen av dei rammene som kommunestyret har sett.

Løvvik viste til at det er gjort harde kutt i heile organisasjonen, og at det må gjerast kutt også framover når ein ser på tala for dei kommande åra. I denne sektoren er det eit meirforbruk samanlikna med andre kommunar, og kommunen ser på at det er rimelegare med rutebuss enn skyss med minibuss.

Monika Thorpe spurte om kva som kan skje dersom VTA-plassane vert flytta til Austrheim, samstundes som Austrheim kommune har gitt ein lånegaranti til Aufera i samband med deira flytting til Manger Sentrum.

Rådmann Liv Løvvik svara at det avgjerande for Aufera er at dei får ei lønsemd i drifta, men for dette er det viktigast med dei friskaste brukarane. Lånegarantien er ikkje så stor. For enkelte av brukarane kan det gje eit betre tilbod om dei kunne hatt dette nærare Austrheim enn Aufera-tilbodet. Det viktigaste her er tilbodet, ikkje om det er på Manger eller Austrheim.

Utkilen sa at ein må finna løysingar, for å sikra at brukarane ikkje kjenner seg sparka bein under eller svikta. Kan rådet her vera med på å finna ei løysing på dette?

Elsa Skare spurte om det er mogleg å utsetta denne saka.

Monika Kvamme svara at det er mogleg. Per i dag er det ein vaktmester som har denne oppgåva, som vikar for den ordinære sjåføren.

Administrasjonen har rekna på kostnaden for ei enklare løysing, med mindre buss som kan henta på Manger måndag/onsdag/fredag, og komme fram til at det vil kosta rundt 23.000 kroner i månaden.

Liv Løvvik sa dersom dette skal utsettast må ein finna saldering for dette nedtrekket. Viste til at kommunen kjem dårleg ut fleire stader, i samband med statsbudsjettet og ein høg andel lønsutgifter av det samla budsjettet.

Atle Utkilen sa at politikarane 12. desember må sjå om det er mogleg på finna midlar til å driva denne bussen vidare.

Liv Løvvik viste lysark som viste den økonomiske framtida kommunen har for seg, der 2020 er det beste året i den kommande fireårsperioden. Kommunen må finna konkrete kutt også dei kommande åra, og eit anna viktig moment er at den demografiske utviklinga tilseier at kommunen må ta høgde for fleire eldre i åra framover.

Atle Utkilen spurte om meir detaljar om underlagsmaterialet for budsjettet. Liv Løvvik sa at kommunestyret i utgangspunktet gjev rådmannen rammer å styra innanfor, Olav B. Andersen følgde opp og sa ein kan ta kontakt med han for å få fleire tal om ein vil.

Liv Løvvik orienterte rådet om at det i 2020 vert starta opp eit arbeid med oppdatering av den bustadsosiale handlingsplanen, der ein vil sjå på kvar kommunen bør tilrettelegga for nye bustader.

Handsaming i rådet:

Fellesframlegg til vedtak, vedteke sams:

Rådet for menneske med nedsett funksjonsevne kjem med eit innspel til budsjett 2020 og økonomiplan 2020-2023. Dette innspelet vert utarbeidd i etterkant av møtet og vert ettersendt til

kommunestyret.

RMNF - vedtak:

Rådet for menneske med nedsett funksjonsevne kjem med eit innspel til budsjett 2020 og økonomiplan 2020-2023. Dette innspelet vert utarbeidd i etterkant av møtet og vert ettersendt til kommunestyret.

Forslag til vedtak (utarbeidd i etterkant av møte i rådet 5.12)

1. *Austrheim kommunen vidarefører busstransporten for brukarane av Aufera, minimum på same nivå som i dag. Det vert satt av naudsynte midlar i budsjett for 2020 til tiltaket.*
2. *Kommunen legg fram eiga sak/vurdering om intern transport i kommunen.*
 - a. *fakta om dagens situasjon. Kva den vert brukt til i dag og kostnader knytt til dette; både sjølve bilen og sjøføør.*
 - b. *alternative løysingar med bruk av mindre bil og også med ekstern avtale t.d drosje.*
 - c. *Kommunen skal involvera aktuelle brukarar av transporttenesta i prosessen.*

Arbeidsmiljøutvalet - 019/19 - 09.12.2019

AMU - behandling:

Gjennomgang budsjett 2020 og økonomiplan 2020-2023
Framlegg til vedtak vart samrøystes tilrådd.

AMU - vedtak:

Framlegg frå AMU vart samrøystes tilrådd.

Kommunestyret - 086/19 - 12.12.2019

KS - behandling:

Rådmann Liv Løvvik orienterte om budsjettet, og viste Excel-dokumentet som viser dei konkrete nedtrekka som er gjort i budsjettet (dokumentet ligg ved), og dei moglegheitene kommunen har til å auka inntektene sine.

Løvvik sa vidare at kommunen er på 100 prosent pluss også dette året, sjølv med dei nedtrekka som er gjort.

Morten Sognnes (H) tok opp flyttinga av 8. klasse Kaland til Årås frå august 2020. Sognnes sa at intensjonen god, men ikkje gjennomtenkt nok. – Eg trur ungdommane frå Åsheim-krinsen i Lindås (kommande Alver) forsvinn frå Kaland til Lindås ved ei slik flytting. Sognnes med forslag om å ikkje flytta desse elevane, men heller ha fådelt skule for dei på Kaland.

Rådmann Løvvik svara Sognnes, og sa at det er gode pedagogiske grunnar til å ikkje ha fådelt skule. – I ein liten kommune som Austrheim skal me raskt klara å samla ungdomsskulen på ein plass, i mellomtida er dette eit tiltak som sikrar eit godt tilbod til elevane i 8. klasse 2020/2021 frå Kaland. Monika Thorpe (Ap) sa at i den situasjonen kommunen er i er det viktig å sjå framover, og sjå kva konsekvensar som kjem av dei vala ein tek. Viktig å sjå langtidsverknadene av budsjettet, både for dei som bur i kommunen og dei som kan tenka seg å bu her i Austrheim. Dette handlar om å gjera Austrheim til ein god kommune. Thorpe la på vegner av Ap/H fram framlegg til nytt verbalpunkt for pleie og omsorg: «Rådmannen må i første kvartal 2020 setja i gang arbeidet med å oppdatere «Eldremeldinga». Ei oppdatert eldremelding skal danna grunnlaget for utviklinga av pleie- og omsorgsavdelinga både når det gjeld bemannings- og investeringsplanar. Investeringsplanane må innehalda tiltak retta mot sjukeheims plassar, omsorgsbustadar og omsorgsteknologi. Kommunestyret ber om at den nye «Eldremeldinga» vert lagt fram til politisk behandling innan sommaren 2020. «Eldremeldinga» må ta utgangspunkt i målet om å etablera ein heiltidskultur i kommunen. Kommunestyret ber om at rådmannen lagar ein plan for å etablera ein slik heiltidskultur i samarbeid med tillitsvalte og verneombod». Thorpe sa at ein her gjev rådmannen prioriterte oppgåver, og ba om at rådmannen gjer dei justeringar som skal til for å finansiera dette. Ann Kristin Leirvåg (Ap) la på vegner av Ap/H fram framlegg til verbalpunkt om Aufera: «Austrheim kommune har nyleg gitt Aufera garantiar for låneopptak knytt til kjøp og innreising av nye lokale. Kommunestyret er uroa for at nedlegging av den kommunale bussruta til Aufera, kan redusera talet på tilsette ved verksemda. Me ber difor rådmannen utgreia ulike løysingar som kan gje dei tilsette eit tilfredsstillande transporttilbod til arbeidsplassen på Aufera. Her bør det vurderast om ein kan finna nye bussjåførarar som ikkje vil medføre ein kostnadsauke i forhold til dagens løysing. Eit anna alternativ som bør vurderast er om me kan erstatta bussen med eit mindre køyretøy som kan køyrast med vanleg bilsertifikat. Eit tredje alternativ er å få Skyss til å etablera bussruter mellom Mastrevik og Manger som korresponderer med ruter til og frå Mastrevik på ein slik måte at dei tilsette får akseptable reisetider til og frå jobb. Den siste løysinga bør kunna kombinerast med transport av elevar frå Manger til Austrheim vidaregåande skule. Kommunestyret ber om at utgreiingsarbeidet får høg prioritet og at ei løysing er på plass innan 1.1.2020. I utgreiingsperioden og fram til ei ny transportordning er på plass, ber kommunestyret om at dei tilsette ved Aufera får tilbod om ei tilfredsstillande transportordning».

Helge Dyrkolbotn (KrF) sa om budsjettprosessen at det har vore manglande informasjon og kommunikasjon, noko som har ført til «armar og bein». Viste til at det har vore etterlyst i formannskapet ei handsaming i ulike råd og organ, slik at dei fekk komma med sine innspel til budsjettprosessen. – Alle innser at det er minimalt med midlar å henta, det kjem lite frå Staten. Synest det er lite fokus på kva som er konsekvensane av alle nedtrekka, og saknar fleire innspel frå dei ulike avdelingsleiarane. Veldig bra at ein brukar Kostra-tal og rapport frå Telemarksforsking, men dette er ikkje fasit for Austrheim kommune. Retningsgjevande, men ikkje fasit for justering i vår kommune. Dyrkolbotn sa at KrF hadde framlegg om innføring av eigedomsskatt i kommunen. – Eg trur kanskje at innbyggjarane i Austrheim kanskje hadde vore med på ein dugnad for å sikra eit betre tilbod innan kultur, ungdomsarbeid, skule og barnehage.

Framlegget:

Budsjett 2020 og økonomiplan 2020-2023

Framlegg frå Austrheim KrF

Austrheim kommune innfører eigedomsskatt frå og med år 2020 til og med 2023

Dette vil gje fylgande auke i **frie disponible inntekter (ca tal)**:

2020	2021	2022	2023	totalt
2 mill	4 mill	6 mill	8 mill	20 mill

Dyrkolbotn (KrF) la også fram eit framlegg om redusert kutt på kultur, midlar til ungdomsrådet og sikra skyss for dei som jobbar på Aufera. – Eg er i tvil om me har sett grundig nok på konsekvensane ved å leggja ned Aufera-skyssen. Ungdomsrådet bør me hjelpa litt, og når det gjeld kultur: Kvifor skal det vera attraktivt å busetja seg i Austrheim om det er skore til bein og marg på kulturmidlar og alle tenester? Eg er redd at kutt i kultur kan gje negative konsekvensar.

Framlegget:

Budsjett 2020 og økonomiplan 2020-2023

Framlegg frå Austrheim KrF

Austrheim kommunestyre gjev rådmannen i oppdrag å løyse fylgjande innanfor budsjettet for 2020:

1. Auke budsjettet for kulturmidlar/anna kultur med kr. 100.000,-
 2. Tilføre Ungdomsrådet kr. 20.000,-
 3. Organisere til tilfredsstillande skysstilbod til våre arbeidstakarar på AUFERA.
- Om flytting av elevar frå Kaland til Årås sa Dyrkolbotn: - Me må slutta å diskutera, me skal slå saman ungdomsskulane og skal gjera det så snart som mogleg. Eg støttar det å flytta 8. klasse-elevane frå Kaland til Årås.

Anne Dahle Austrheim (KrF) la fram eit framlegg om å redusera nedtrekket for Austrheim Sokn:

Framlegget:

Budsjett 2020 og økonomiplan 2020-2023

Framlegg frå Austrheim KrF

Endring i overføring til Austrheim Sokn:

Nedtrekket vert redusert frå 500.000 kr til 300.000 kr.

Austrheim viste til at kommunen pliktar å støtta kyrkja sitt arbeid. - Inntektene kyrkja har er det som kjem frå kommunen, og elles gåver, men gåveinntektene går til trusopplæringstenester. Til samanlikning er posten til rådmannen auka med 1.170.000, og dette er finansiert mellom anna med nedtrekk på 500.000 til kyrkja.

Atle Utkilen (Bygdelista) tok opp saka om skyss til Aufera for dei som jobbar der. Utkilen viste til at han er leiar i rådet for menneske med nedsett funksjonsevne (RMNF), som også har handsama denne saka. – Eg ønskjer at kommunen vågar å setja ord på ein del område som me ønskjer å sikra.

Klarer me ikkje å sikra dette, så må me innføra eigedomsskatt øyremarka desse tiltaka. Eg håpar at dei som har sett prestisje på at ein ikkje skal ha eigedomsskatt er med på det. Utkilen ba også om ei betre utgreiing av skyssen til Aufera.

- Når det gjeld investeringar vil Bygdelista framskunda eldrebustader på Kaland. Eg meiner det er mogleg å omprioritera noko av investeringsmidlane neste år, då ein ikkje klarer å setta i gang alt der uansett. Bygdelista er klar på me ønskjer ein ungdomsskule i Austrheim.

Morten Sognnes (H) la fram eit framlegg på vegner av Høgre og Ap, om å utsetja saka som gjeld flyttinga av elevar frå Kaland til Årås:

Framlegget:

Skule og 8. klasse ved Kaland barne- og ungdomsskule i 2020/2021.

Austrheim kommunestyre utsetter den delen av saka som omhandlar flytting av 8. klasse.

Kommunestyret ber om at rådmannen tar kontakt med dei berørte partar, og kjem tilbake med ei sak til neste kommunestyremøte som vurderer fordelar og ulemper ved denne saka.

Sognnes la også fram eit framlegg (på vegner av Høgre og Ap) om at administrasjonen snarast set i gang arbeidet med felles ungdomsskule.

Framlegget:

Grunnskule. Rådmannen må snarast mogeleg setja i gang arbeidet med å etablera ein felles ungdomsskule i kommunen. Målet må vera at politikarane får saka til handsaming i vårsesjonen i 2020 og at ein felles ungdomsskule er på plass frå skuleåret 2021/22. I samband med rådmannen sitt utgreiingsarbeid om ein felles ungdomsskule, må det også greiast ut om det kan vera tenleg å samla mellomtrinnet på ein av skulane. FAU, SU, tillitsvalte, Ungdomsrådet og verneombod må involverast i prosessane. Eventuelle endringar i skulestrukturen i Austrheim kommune er ikkje økonomisk motivert, men skal gjerast for å sikra eit best mogeleg skuletilbod til elevane i kommunen. Hardy Pedersen (Ap) la fram to framlegg på vegner av Høgre og Ap:

Vatn og avlaup.

Dei største investeringane dei komande åra vil vera knytt til vatn og avlaup. Kommunestyret ber om at ein oppdatert investerings- og framdriftsplan for dette fagfeltet vert lagt fram for kommunestyret 13. februar 2020.

Ungdomsrådet.

Ungdomsrådet i Austrheim er ein viktig ressurs i arbeidet med å skapa ein kommune med gode oppvekstvilkår. Kommunestyret beklagar at Ungdomsrådet mista heile den økonomiske støtta frå kommunen i 2019. Kommunestyret løyver med dette kr 30 000,- i støtte til Ungdomsrådet sitt arbeid i 2020.

Reidar Øksnes (SP) etterlyste at ein kunne leggja inn dei ulike fromme framlegga i eit levande rekneark, der ein såg etter kvart korleis ein måtte kutta for å få dette til å gå opp. – Eg støttar at ein løyver pengar til ungdomsrådet slik at dei kan utføra dei oppgåvene dei har. Er samd i at det ikkje er mogleg å gjennomføra investeringar for 15 millionar i VA i 2020. Øksnes sa om

Nordhordlandspakken: - Med bommane i Knarvik har Austrheim ein unik sjanse som ein attraktiv plass å bu i og flytta til også for næringslivet. Me må reklamera for Austrheim som ein god plass å bu. Om ungdomsskulen sa Øksnes: - Dei to siste periodane har det dette med skulestrukturen i Austrheim vore utgreidd to gonger, begge gonger har ein gått inn for ein skule og begge gongane har kommunestyret teke dette til vitande. Alle partar har vore med i det arbeidet som er gjort. Må ikkje no starta ein ny runde planlegging, anten gjer ein dette no eller aldri. Åsheim-krinsen må Alver kommune ta ansvar for. Manglande vilje til vedtak i Austrheim har gjort at Lindås har sleppt veldig lett frå dette.

Ordførar Per Lerøy (Ap) svara om investeringar i 2020: - Fylkesmannen har sett krav om at alle investeringar er sjølvfinansierande, så kommunen kan ikkje omdisponera desse 15 millionane som står på VA.

Reidar Ulvøy (Ap) la på vegner av Høgre og Ap fram framlegg om trafikksikringsplan:

Framlegget:

Trafikksikring.

Austrheim kommune har dei siste åra fått fleire tilskot frå fylkeskommunen til trafikksikringstiltak. Årsaka til dette er at kommunen har hatt ein relativt oppdatert og realistisk trafikksikringsplan. Det har også vore god samanheng mellom trafikksikringsplanen og vedtekne regulerings- og områdeplanar. No må trafikksikringsplanen oppdaterast slik at den også i framtida kan danna grunnlag for nye tilskot til trafikksikringsarbeidet i kommunen.

Ulvøy sa vidare: - Eg har spørsmål til rådmannen og dei som vil ha eigedomsskatt, kva konsekvensar kan dette ha for barnefamiliar, eineførsørgjarar og minstepensjonistar med eigen bustad? Eg meiner det er etableringsfiendtleg. Kan rådmannen sjå på følgjande, frysing av løn og gode i perioden, gjeldande for leiarstillingar, rådmannen inkludert? I privat næringsliv kan lønene svinga med konjunktoren.

Rådmann Løvvik svara Ulvøy om eigedomsskatt: - Dette med eigedomsskatt er sett på ut frå likningsverdien, og ikkje full marknadstaksering. Eigedomsskatt på hus og hytter må starta på ein promille, og det vert små summar. Generelt er det slik at dei som har råd til bustad, har råd til skatt. Rådmann Løvvik svara Ulvøy om løn: - Ingen av dei tilsette har vore særleg motiverte for lønnsfrys.

Kommunen har nett rekruttert eit par nye kommunalsjefar, og må evt. leita på nytt om desse seier nei til lønsfrys. Lønsfrys er ein nedgang i realløna, og eg trur ikkje dei tillitsvalde vil vera omforent om dette.

Britt S. Lerøy (Ap) sa om innkjøp: - Eg ønskjer ein gjennomgang av innkjøp og anskaffingsstrategi. Har oppfatta at Austrheim kommune i stort omfang nyttar seg av Bergensavtalen, men vårt lokale næringsliv er små og når ikkje opp i dette like lett. Eg ønskjer større bruk av lokale næringsaktørar. På vegner av Ap og H la Lerøy fram dette framlegget:

Bruk av lokalt næringsliv.

Fleire av våre lokale butikkar er med i Merkur-programmet. Det er eit mål for statlege myndigheiter å sikra eit desentralisert tenestetilbod til innbyggjarane og gjennom Merkur-programmet ønskjer dei å styrka dei små distriktsbutikkane. Kommunestyret ber rådmannen greia ut om det er mogeleg for kommunen å handla meir lokalt både når det gjeld varer og tenester slik at kommunen kan bidra til å sikra eit lokalt mangfald av bedrifter.

Varaordførar Inger Lise Brekke (H) sa om Aufera skyssen: - At ein sel Aufera-bussen og endrar sjåføren betyr ikkje at tenesta forsvinn, men korleis dette er sett saman kan verta endra på. Eg opplever at prosessane har mangla dialog med interesserte partar og andre, dette er noko administrasjonen må vera merksam på. Det er viktig at det er ein god dialog og ein god prosess med dei ulike partane. Brekke ba om gruppeleiar møte etter at alle som hadde teikna seg for innlegg hadde sleppt til.

Rikke Heldal Hope (H) sa om eigedomsskatt: - Det er nok semje om at kommunen hadde trengt friske midlar, men eigedomsskatt er ein usosial skatt som ikkje tar omsyn til evna til å betala.

Eigedomsskatt kan føra til at folk må selja bustaden sin, av di dei ikkje har råd til å betala denne skatten.

Morten Sognnes (H) sa om Kaland skule og flytting av 8. klasse til Årås i 20/21: - Eg meiner det er frekt, sårande og uansvarleg å seia at Alver får ta ansvar for desse Åsheim-elevane. Kaland har i dag 31 elevar som gjev 750.000 kroner inn i kommunekassen. Det vil også kosta noko i skyss å senda elevar frå Kaland til Austrheim.

Atle Utkilen (Bygdelista) sa om Kaland skule og flytting av 8. klasse til Årås i 20/21: - Kanskje me skulle spurt ungdommane, det er få elevar i denne klassen, og kanskje dei vil til Årås? Økonomien i dette er ein ting, men også andre ting spekar inn.

Reidar Øksnes (Sp) sa om Kaland skule og flytting av 8. klasse til Årås i 20/21: - Me har ansvar for våre eigne elevar. Austrheim kommune har ei negativ utgift på Åsheim-elevane. Har prøvd å skru opp prisen tidlegare, då er trusselen frå Lindås at dei dreg elevane ut. Til Sognnes svara Øksnes: Det er kanskje frekt å seia at Alver kommune må ta ansvar for Åsheim-elevane, men eg får stå for det.

Bjørn Inge Håland Dyrkolbotn ba om at ein fann ei løysing der ein har bussen vidare (den som blir brukt til Aufera-skyssen): - Så langt eg veit er bussen kjøpt for alle, og me kan bruka den mot å fylla drivstoff. Me kan evt. kjøra den sjølv, ved at kommunen dekkjer utgiftene til sertifikat. I dag er det rimelegare å låna tilbake den bussen som vart selt til den vidaregåande skulen, enn å bruka eigen buss i kommunen.

Morten Sognnes (H) sa om Kaland skule og flytting av 8. klasse til Årås i 20/21: - Eg er ikkje mot å samla skulen, men vil samla ungdomsskulen på Kaland heller. Om me sender elevane Årås og taper elevane frå Åsheim-krinsen så er det ikkje sikkert me tener noko på denne endringa.

Einingsleiar teknisk drift, Rolf Henning Myrmel, svara om minibussen: - Den er kjøpt til ungdomsklubben, men dei har nesten ikkje brukt den pga. høg kostnad ved bruk. Seinare er det tilsett sjåfør. Minibussen har lagt på teknisk sitt budsjett, men me har ikkje brukt den. Den er også brukt til kjøra elevar på symjing, det er dette og Aufera den er brukt til, og nokre få andre oppdrag som til dømes for barnehage og eldre. Me har måtta brukt vikar og overtidsmidlar for å dekkja denne skyssen til Aufera, og har i dag ikkje meir enn ein person som kan kjøra bussen.

Møtet vart sett på pause for gruppeleiar møte, det det vart sett opp verbalpunkt til å stemma over.

(nummereringa er frå framlegga)

Etter gruppemøtet var det avrøysting over budsjettet:

Punkt 1-11 (frå formannskapet): Samrøystes vedteke

Punkt 12 (erstattar punkt 12 frå formannskapet): Samrøystes vedteke

Punkt 13: Samrøystes vedteke

Punkt 14: Vedteke mot tre røyster, Sp sine tre representantar Bjørn Inge H. Dyrkolbotn, Reidar Øksnes og Lise R. Helle

Punkt 15: Samrøystes vedteke

Punkt 16: Samrøystes vedteke

Punkt 17: Samrøystes vedteke

Punkt 18: Samrøystes vedteke

Punkt 19: Samrøystes vedteke

Punkt 20: Samrøystes vedteke

Punkt 21: Samrøystes vedteke

Punkt 22: Samrøystes vedteke

Punkt 23: Nedstemt, med 10 (Høgre og Ap) mot 7 (Sp, KrF og Bygdelista)

Punkt 24: Nedstemt, med 10 (Høgre og Ap) mot 7 (Sp, KrF og Bygdelista)

Punkt 25: Nedstemt, med 10 (Høgre og Ap) mot 7 (Sp, KrF og Bygdelista)

Punkt 26: Samrøystes vedteke

Til slutt vart det røysta over samla budsjett.

Det vart vedteke mot 1 røyst, Atle Utkilen (Bygdelista).

KS - vedtak:

1. Budsjett 2020 – Økonomiplan 2020-2023, vert tilrådd slik det ligg føre i vedlagde tabelloppsett, med fylgjande endringar på driftsrammene for dei einskilde åra:

Rammeområde	2020	2021	2022	2023
Ansvar				

2. Total ramme for 2020 til fordeling drift vert kr. 200 307 000,- . Rådmannen har mynde til å tildele til dei ulike ansvarsområda innanfor denne ramma.

3. Den totale investeringsramma for år 2020 vert sett til 19 400 000 kr:

Føremål	Kostnad
Låneautomat bibliotek	100 000
Fagfornyng skulane PC småskuletrinn	500 000
IKT skulane	150 000
IKT barnehagane	100 000
Kaland 1 skulekjøkken	100 000
Omsorgsteknologi	1 000 000
Steinalderbuplassen Fosnstraumen	200 000

Tiltak i landbruket	300 000
VA-investeringar	15 000 000
IKT kommunen	150 000
IKT felles i kommunen	400 000
Byggutbetring	500 000
Kyrkja – utbetring	700 000
Digitalisering/ombygging i Servicekontoret	200 000
	19 400 000

Den totale investeringsramma for 2020 vert finansiert slik:

Ordinært låneopptak 8, 4 mill

Overføre førre år 8,5 mill

Sal av eiged. 2,5 mill

Prosjekt som vart vedteke for 2019 og ikkje er avslutta, vert vidareført innanfor vedteken ramme slik det vart finansiert i 2019.

Vekta avdragstid på låneopptak for 2020 vert fastsett til 30 år.

4. Måla for drifta vert vedteke slik dei går fram av kommuneplanen vedteke den 11.04.2019 i K-sak 017/19.

5. Rådmannen utarbeider detaljbudsjett og resterande lovfesta hovudoversikter, med bakgrunn i gjevne driftsrammer.

6. Kommunestyret skriv ut eigedomsskatt på næringseigedom, kraftverk, vindkraftverk, kraftnett og anlegg omfatta av særskattereglane for petroleum jf. eigedomsskattelova (esktl.) § 3 første ledd bokstav d. Eigedomsskattesatsen vert vidareført med 7 promille. Utskrivingsalternativet omfattar også flytande oppdrettsanlegg i sjø, jf. Esktl. § 4 tredje ledd.

7. Takstvedtekter for eigedomsskatt i Austrheim kommune vedtatt i kommunestyret i K-sak 083/17 i møte 14.12.2017, skal gjelde for eigedomsskatteåret 2020, jf. esktl. § 10.

8. Kommunen vil i 2020 skrive ut eigedomsskatt på eigedommar som tidlegare var rekna som «verk og bruk» på eit «særskilt fastsett grunnlag» med heimel i overgangsregelen til eigedomsskattelova §§ 3 og 4 første ledd. Det særskilde grunnlaget skal i 2020 være lik 5/7 av differansen mellom eigedomsskattegrunnlaget i 2018 og 2019 som er forårsaka av at produksjonsutstyr- og installasjonar ikkje skal reknast med i grunnlaget.

9. Kommunen vil i 2020 skrive ut eigedomsskatt på bygningar og grunnareal så langt desse var omfatta av eigedomsskattegrunnlaget for verk og bruk i 2018, jf. overgangsregelen til eigedomsskattelova §§ 3 og 4 andre ledd.

10. Eigedomsskatten vert skriven ut i 2 terminar jf. esktl. § 25 første ledd. Siste alminnelege taksering i kommunen vart gjennomført i 2018 og 2019.

11. Marginavsetnad vert fastsett til 10% for 2020.

12. Kommunestyret ber om at rådmannen gjer følgjande utgreiingar i 2020:

Kostnader, pedagogiske og sosiale effektar av å samla ungdomstrinnet på ein av skulane i kommunen. Her må både investeringskostnader og driftskostnader gjerast greie for og det må leggjast fram ein realistisk framdriftsplan.

Kostnader, pedagogiske og sosiale effektar av å samla mellomtrinnet på ein av skulane i kommunen. Her må både investeringskostnader og driftskostnader gjerast greie for og det må leggjast fram ein realistisk framdriftsplan.

Kommunestyret ber om klare råd om korleis skulestrukturen i kommunen skal vera i framtida. Målet må vera at ein kan få på plass ein felles ungdomsskule frå skuleåret 2021/2022.

Kommunestyret ber også rådmannen om å starta drøftingar med Alver kommune om godtgjersle for elevar frå Åsheim-krinsen som går på Kaland barne- og ungdomsskule.

13. Skule og 8. klasse ved Kaland barne- og ungdomsskule i 2020/2021. Kommunestyret viser til det første punktet i dette budsjettnotatet, og understrekar at debatten om lokalisering av ein felles ungdomsskule i kommunen ikkje vil bli påverka av om elevane på 8. klassetrinn vert samla på Årås skule komande skuleår.

14. Austrheim kommunestyre utsett den delen av saka som omhandlar flytting av 8. klasse, og ber om at rådmannen tar kontakt med dei berørte parter og komma tilbake med ei sak til neste kommunestyremøte, som vurderer fordelar og ulemper ved denne saka.

15. Pleie og omsorg. Rådmannen må i første kvartal 2020 setja i gang arbeidet med å oppdatere «Eldremeldinga». Ei oppdatert eldremelding skal danne grunnlaget for utviklinga av pleie- og omsorgsavdelinga både når det gjeld bemannings- og investeringsplanar. Investeringsplanane må innehalda tiltak retta mot sjukeheims plassar, omsorgsbustadar og omsorgsteknologi. Kommunestyret ber om at den nye «Eldremeldinga» vert lagt fram til politisk behandling innan sommaren 2020.

«Eldremeldinga» må ta utgangspunkt i målet om å etablera ein heiltidskultur i kommunen.

Kommunestyret ber om at rådmannen lagar ein plan for å etablera ein slik heiltidskultur i samarbeid med tillitsvalte og verneombod.

16. Vatn og avlaup. Dei største investeringane dei komande åra vil vera knytt til vatn og avlaup. Kommunestyret ber om at ein oppdatert investerings- og framdriftsplan for dette fagfeltet vert lagt fram for kommunestyret 13. februar 2020.

17. Klima og miljøplan. Kommunestyret ber rådmannen laga ein ny klima og miljøplan. Målet må vera at Austrheim kommune berre skal nytta fornybar energi til oppvarming av bygg innan utgangen av 2025. Alle personbilar og små varebilar som kommunen kjøper i perioden etter 2021, skal vera nullutsleppskøyretøy. Nye ladepunkt må etablerast. Klima og miljøplanen skal også innehalda tiltak som sikrar at alle avdelingar i kommunen skal vera sertifiserte «Miljøfyrtårn» innan 2023.

18. Trafikksikring. Austrheim kommune har dei siste åra fått fleire tilskot frå fylkeskommunen til trafikksikringstiltak. Årsaka til dette er at kommunen har hatt ein relativt oppdatert og realistisk trafikksikringsplan. Det har også vore god samanheng mellom trafikksikringsplanen og vedtekne regulerings- og områdeplanar. No må trafikksikringsplanen oppdaterast slik at den også i framtida kan danne grunnlag for nye tilskot til trafikksikringsarbeidet i kommunen.

19. Bruk av lokalt næringsliv. Fleire av våre lokale butikkar er med i Merkur-programmet. Det er eit mål for statlege myndigheiter å sikra eit desentralisert tenestetilbod til innbyggjarane og gjennom Merkur-programmet ønskjer dei å styrka dei små distriktsbutikkane. Kommunestyret ber rådmannen greia ut om det er mogeleg for kommunen å handla meir lokalt både når det gjeld varer og tenester slik at kommunen kan bidra til å sikra eit lokalt mangfald av bedrifter.

20. Skyss Aufera. Rådmannen får i oppdrag, i samarbeid med brukarane og Aufera, å organisere eit tilfredsstillande skyssstilbod til våre arbeidstakarar på Aufera. I tillegg ber ein om ei vurdering av det generelle transportbehovet i kommunen.

21. Barnehagane. Styrar i barnehagane må få handlingsrom og ekstra midlar for å kunna tilkalla assistent dersom dette er naudsynt for å sikra forsvarleg drift. Dette gjeld dei timane pedagogane ved barnehagane skal avvikla plantida si.

Barnehagane får behalda assistentar som tilsvarer 1,2 årsverk i Austrheim Kystbarnehage og 0,6 årsverk i Kaland barnehage.

22. **Ungdomsrådet.** Ungdomsrådet i Austrheim er ein viktig ressurs i arbeidet med å skapa ein kommune med gode oppvekstvilkår. Kommunestyret beklagar at Ungdomsrådet mista heile den økonomiske støtta frå kommunen i 2019. Kommunestyret løyver med dette kr 30.000,- i støtte til Ungdomsrådet sitt arbeid i 2020.

23. Om nye verbalpunkt: Med dette notatet vil kommunestyret gje rådmannen nokre prioriterte oppgåver. Nokre av framlegga vil ha økonomiske konsekvensar som vil endra budsjettbalansen. Me ber om at rådmannen gjer justeringar i budsjettet for å dekkja inn dei ekstra kostnadane.

Saksopplysninger: